

DARI SEBULAN KE SEBULAN

Utusan Melayu nampaknya untuk mencari jalan supaya akhbaranya ramai dibaca orang telah membuat suatu kempen menyiarkan-nyiarkan dengan besar perkara ucapan Taha Suhaimi tentang “Berkenalan dahulu sebelum kahwin dengan berjalan-jalan ke tepi laut yang berdasarkan hukumnya daripada sebuah kitab dan majalah yang dilupai pula namanya”. Penulis-penulis yang anti hukum agama dan berpandu kepada nafsu dikeluarkannya banyak-banyak sebagai penyokong sedang tulisan-tulisan yang membentangkan hukum dan adat resam Islam yang bertentangan dengan pendapat Taha Suhaimi seolah-olah diketepikan. Apakah ini tidak dipandang oleh orang-orang Islam sebagai menyakiti hati dan perasaan orang Islam?

Apakah ini tidak menunjukkan suatu langkah yang boleh dipandang coraknya sebagai anti-Islam? Pembaca-pembaca sendiri boleh mengukurnya.

* * *

Di dalam ucapan radionya, Ketua Rombongan Kebudayaan Indonesia yang dijemput oleh kerajaan Singapura panjang lebar menunjukkan asas-asas kebudayaan Indonesia yang bercorak Hindu. Perkara-perkara kemegahan Hindu dengan gamelannya dan sejarah-sejarah Hindu dibesar-besarkan dan dibuat mereka sebagai satu kemegahan tetapi perkara-perkara yang mengenai kebudayaan Islam dan pengaruh Islam di Indonesia hanya disebut tidak sampai sepuluh patah kata. Apakah ini tidak menjadi bukti bahawa penjajahan Jawa sudah mulai dijalankan dengan membesarkan kebudayaan Jawa yang berunsur Hindu lalu meninggalkan kebudayaan lain-lain daerah-daerah yang berunsur Islam? Orang-orang di *Federation* hati-hati Bung! Dengan pengaruh kebudayaan kelak orang-orang akan dijauh dari Islam. Orang-orang ingat pula siapakah Menteri

Pendidikan dan Kebudayaan Indonesia yang berkuasa sekarang?

* * *

Tuan Taha Suhaimi, Hakim Mahkamah Shar‘iyyah, Singapura menyatakan kepada akhbar bahawa mustahak diadakan syarat-syarat bagi orang-orang yang mau kahwin lebih daripada satu. Kadi, katanya, hendaklah diberi hak menanya tentang kebolehan orang-orang itu dalam belanja hidup dan seumpamanya. Cara ini, adalah tentunya membanyakkan kadi terlibat dalam perkara makan suap kerana harus orang-orang yang telah mau kahwin itu, kalau banyak soal lalu menghulurkan sebahagian kepada yang bertanya tentu akan meluluskan. Selain daripada ini langkah ini lebih berbahaya kerana harus akan menjerumuskan seseorang yang mau kahwin dengan halal itu membawa kepada perzinaan.

* * *

Dalam pilihanraya parlimen Persekutuan yang berakhir pada 19 Ogos telah berakhir dengan 73 bagi Perikatan dan 30 bagi parti-parti lain, termasuk seorang pakar parti negara, Dato’ Onn bin Jaafar. Kalau dalam kerajaan yang lalu Perikatan menghadapi hanya 2 orang pembangkang maka sekarang ada 30 orang termasuk orang-orang jaguh-jaguh lawan-lawan Perikatan yang tidak akan diam atau bungkam sahaja. Sedikit hari lagi kita akan mendengar soal jawab yang hebat. “Berabih” – kata orang Jakarta. Kerana itu kerajaan Perikatan mesti berhati-hati sebab harus jaguh-jaguh ini akan menyatakan kepada umat apa yang dibuat salah oleh mereka hingga ke akar-akarnya.

(sambungan pada muka 42)

Dari Sebulan ke Sebulan

(sambungan dari muka 6)

Di dalam satu dua tempat di Persekutuan jamuan-jamuan kemenangan daripada pihak-pihak yang menang di dalam pilihanraya telah diadakan. Majlis-majlis itu menjemput pula pihak-pihak lawan mereka. Di sana mereka bermaaf-maafan di atas perkara “maki hamun” di dalam mempengaruhi undi ramai. Cara ini sangat baiknya dibuat mereka dan diambil berat oleh pemimpin-pemimpin besar supaya mereka bersama-sama mengadakan jamuan bermaaf-maafan kerana banyak pula daripada pemimpin-pemimpin itu yang kuat *sentiment* – tidak mau bertegur dan bercakap-cakap dengan lawannya.

* * *

Kerajaan Persekutuan, daripada apa yang difahamkan daripada ucapan Perdana Menteri Persekutuan Tengku Abdul Rahman Putra al-Haj telah memerintahkan kepada pegawai Jabatan Maklumat Persekutuan, A. Ya’kub Abdul Latif supaya mengadakan sebuah cawangan bagi memberi penerangan-penerangan agama kepada umum. Ini adalah satu langkah yang baik tetapi hendaklah diingat di dalam memberi penerangan itu hendaklah yang diberi untuk menginsafkan orang kepada agamanya – bukannya di dalam perkara yang membawa perpecahan seperti perkara-perkara yang membangkitkan perselisihan umat apalagi dalam perkara-perkara yang menentang hukum-hukum Islam yang dikeluarkan oleh “orang Islam” seperti yang dibuat mengikut pendapat Tuan Taha Suhaimi menyuruh orang kahwin berkenal-kenalan dahulu dan berjalan-jalan di tepi laut.

* * *

Seramai lebih 200 orang guru-guru sekolah Inggeris di Singapura yang berasal dari Tanah Melayu dikatakan telah berusaha mendapatkan kerja di Persekutuan sekalipun gajinya lebih murah daripada Singapura setelah dipotong *allowance* mereka. Hal ini, disangka orang tidak

lain kerana tidak senang hati kerana sesuatu pekerjaan yang dijalankan dengan tidak sepenuh-penuh hati bukannya sahaja guru yang mengajar tidak cergas tetapi kelak berkesan pula kepada kanak-kanak.

* * *

Berkaitan dengan ini juga, kerana perintah-perintah supaya sekolah-sekolah dibuka enam hari termasuk hari Sabtu maka orang-orang Kristian dari mazhab Seven Day Adventist telah sama-sama dikatakan hendak berhenti sebab hari sabtu ialah hari kelepasan mereka – mereka hari itu diharamkan oleh agamanya bekerja. Dengan ini mereka terpaksa memilih taat kepada kerajaan atau taat kepada agama mereka. Ini pun salah satu daripada perdirian.

* * *

Kerajaan Singapura telah memberi gaji kepada *chief-chief Kadi* di Singapura kerana mengapit Hakim Mahkamah Shar‘iyyah. Orang-orang yang mengikuti apa yang berlaku di dalam beberapa minggu ini tentang pendapat Tuan Taha Suhaimi “berkenalan dahulu sebelum kahwin” orang-orang bertanya apakah kerajaan telah menyedari bahawa harus Hakim Mahkamah Shar‘iyyah itu tidak mempunyai kelayakan-kelayakan yang dikehendaki? Sebahagian orang hanya berkata *wa Allāhu a ‘lam*.

* * *

Di Indonesia sekarang, harga wang kertas 1,000 rupiah diakui harganya hanya 100 rupiah. Demikian juga wang 500 rupiah berharga 50 rupiah sahaja dan sesiapa yang ada wang di bank lebih daripada 25,000 rupiah maka wang itu “dipinjam” oleh kerajaan dengan jangka panjang. Ini ialah cara demokrasi terpimpin Sukarno yang sifatnya, dalam perkara ini bukannya meminjam tetapi pinjam paksa – ertiinya pinjaman yang tak boleh ditolak dengan mau atau tidak mau. Berapi . . . kata orang Jakarta.